

INUIT ATAQATIGIIT

Inatsisartuni



UPA 2019/117
08-05-2019
Mimi Karlsen

Meeqqat atuarfianni pisortat, ullumikkut piumasaqaataareersut saniatigut, pisortaasinnaanissaminnut atuarfinni pisortatut ilinniagaqarsimanissaannut piumasaqaateqarnissaq pillugu Naalakkersuisut siunnersuummik suliaqaqqullugit peqquneqarnissaannik siunnersuut. Piumasaqaat ilinniartitaanikkut aaqqissuusseqqinneq aallartinneqarsimasoq eqqarsaatigalugu meeqqat atuarfiat pillugu inatsisissatut siunnersuutissatut naatsorsuutigineqartumut kingusinnerpaamik ilanngunneqassaaq.

(Inatsisartunut ilaasortaq, Sofia Geisler, Inuit Ataqatigiit)

Pisortatut inissisimaneq pisortaanissamullu piginnaasaqarluarneq tamatigut piginneqareertuaannangilaq, pisortaanerlu ilinniartitsisunngorniarnermi ilinniarnermi sammineqartarani. Taamaammat pisariaqarpoq piginnaasaqalernissamut inerisaasoqarnissaa. Inuit Ataqatigiit Sofia Geisler qutsavigiumavaat ullumikkut piumasaqaataareersut saniatigut, pisortaasinnaanissaminnut atuarfinni pisortatut ilinniagaqarsimanissaannut piumasaqaateqarnissaa pillugu Naalakkersuisut siunnersuummik suliaqaqqullugit peqquneqarnissaannik siunnersuuteqarmat.

Atuarfiup pisortaata perorsaanikkut, allaffissornikkut sulisunullu tunngasunut aqutsinissaq suliassaraa. Inuit Ataqatigiinni isumaqarpugut atuarfimmik aqutsisuuneq suliassaasoq tamatigoortuullunilu imaannaanngitsoq. Atuarfiup pisortaa sulisitsisutulli allatut kaammattuisinnaassaaq, ataatsimoortitsisinnaassaaq aaqqiagiinngissuteqartoqartillugulu aaqqiissuteqarsinnaasuussaaq. Ulluinnarni sulinermini atuarfiup pisortaa susasaqartunut attaveqartuassaaq, soorlu atuartunut, angajoqqaanut, ilinniartitsisunut, politikerinut inuussutissarsiortunullu, taakkumi assigiinngitsutigut atuarfiup ingerlanneqarneranut piumasaqaateqartarput, tamakkulu atuarfiup pisortaata naammassiniartartussaavai.

Ullumikkulli tikillugu meeqqat atuarfianni pisortanngorniaraanni taamaallaat ilinniartitsisutut nalinginnaasutut ilinniagaqarsimanissaq piumasaqaataasarpog. Ilinniartitsisutummi ilinniarsimagaanni perorsaanermik, pamersaanermik atuartitsinermillu ilinniarsimanerup atuarfiup pisortaanissaq piuminarsisittarpaa.

Ullutsinni suliffeqarfinni allani sulisitsisusunut piumasaqaataasarpog iisimassallugit: aqutsillaqqissuunissaq, sulisunik isumasiullaqqinnissaq, attaveqarluarsinnaanissaq, suliassanut kaammattuillaqqinnissaq aammalu allaffissornikkut aningaasanillu aqutsisinnaanissamik pisinnaasaqarnissaq.

Taakkuttaaq aamma atuarfiup pisortanngorniartunut piunasaqaataammata taakkununga ilinniartitsissutigineqarnissaat pisariaqarput. Aammattaaq pamersaanermut (pædagogisk) aqutsisuusuunissaq pisariaqarpoq.

Kikkut tamaasa atuarfiup pisortaata suleqatigisinnaasussavai, tamannalu piunasaqaataavoq annertoq. Taamaamat atuarfiup pisortai ilinniarfeqartariaqarput suliamik oqimaatsumik suliaqarsinnaaniassamat.

Atuarfiup pisortaa oqimaagisaanik suliassikkutsigu erninnaq suliaminik oqi, aarsalissaaq, suiaminillu sumiginnaalerluni. Sumiginnaalerpat meeqqat angusarissaarsinnaajunnaassapput. Tamanna pinngitsoortittariaqarparput.

Sutigut tamatigut meeqqat atuarfimminnit pitsaasumik angusaqarnissaat aqutissiuuttuaannartariaqarparput. Pitsaasumik angusaqartut ilinniarinnut isernissaminnut aqutissiuulluarneqassapput. Taamaamat atuarfiup pisortaasa pisortatut iliniarsimasuunissaat anguniartariaqarparput.

Maanna Ilinniarfissuaq ilinniartitsisunngorniartittuunnaq ingerlavoq. Inuit Ataqatigiit takorloorsinnaavarput ilinniartitsisunngorniartit naammassigaanni atuarfiup pisortanngorniartutut ingerlaqqittoqarsinnaasoq, immaqa ukioq ataaseq, marlulluunniit.

Amma periarfissaavoq ilinniaritsisunngorniartit immikkut atuartitsisutitut ingerlanneqarsinnaavoq, tassa ilinniartitsisunngorniartitigaluni immikkut atuartitsisutitut (fag) toqqarneqarsinnaassalluni.

Inuit Ataqatigiit meeqqat atuarfianni pisortat, ullumikkut piunasaqaataareersut saniatigut, pisortaasinnaanissaminnut atuarfinni pisortatut ilinniagaqarsimanissaannut piunasaqaateqarnissaq taamaalilluta naammassineqarsinnaanngussagalarpoq, taamaamat siunnersuut akueraarput ataatsimiitsitaliamullu susassaqartunut ingerlakkumallugu.